



«Stadtgarten» da Cuira è in lieu da sentupada per drogads da narcotics e personas che sa chattan a l'ur da la societad.

FOTO SOMEDIA PHILIPP BAER

«Disproporziun tranter scena da drogads e purschidas d'agid»

«I regia ina situaziun extraordinaria. Intgins umans dovran alcohol, drogads u medicaments per sa deliberar dal stress», scriva «Sucht Schweiz» en ina publicaziun da quest onn. La FMR ha discurrì cun il cusseglier da la citad Cuira Patrik Degiacomi, cun il mainagestiun da l'uniun «Überlebenshilfe» Carlo Schneider, cun la manadra da l'Uffizi dal servetsch social chantunal Susanna Gadiant e cun la Polizia chantunala davart la scena da drogads a Cuira.

LAURA SCHÜTZ/FMR

«Il «Stadtgarten» da Cuira è – sco gia ils davos 30 onns – in lieu da sentupada per drogads da narcotics e personas che sa chattan a l'ur da la societad, dapi l'atun 2019 puspè en ina furma plitost creschenta», di la Polizia chantunala. La regenza grischuna ha dà l'incumbensa a l'Uffizi da coordinaziun spezialisà svizzer da dependenza «Infodrog» d'intercurir la situaziun ed il basegn d'agid per toxicomans en il chantun Grischun. «Infodrog» ha sinquai constatà ch'intginas purschidas mancan.

Davosa scena averta da drogads svizra?

Da dir ch'i sa chattia a Cuira la davosa scena averta da drogads da la Svizra, fiss però fallà tenor la Polizia chantunala. Da lur vart e da la vart da la polizia da la citad na vegnia tolerà nagin consum e commerzi public. Dapi ch'ins haja constatà gruppaziuns pli grondas en il conturn dal «Stadtgarten» haja ella augmentà sias controllas.

Era *Patrik Degiacomi*, schef dal departament furmaziun sanadad cultura, chatta il maletg d'ina scena da drogads averta surfatg. I saja dentant uschia che la scena da drogads sa chattia sper la chasa da scola dals emprendists e da las emprendistas da commerzi e sper la chasa da dimora Florentini. «Blera glied, era da las valladas, è inquietada. Nus survegnin reclamaziuns da personas d'instrucziun e da geniturs pervia dal batlegiar e da las squittas ch'ins chatta era en regiuns sco il Welschdörfli e la via da la staziun», raquinta Patrik Degiacomi. Sch'el vesia glied che consumeschia drogads sper chasas da scola primaras u audia istorgias d'uffants pitschens che passan en squittas sa fetschia el quitads, era sco minister da furmaziun.

Scena a Cuira

Tenor la statistica criminala da l'onn 2020 da la polizia chantunala è la gronda part dals consuments e da las consumentas da meds narcotics umens (85%) e Svizzers/ras (71%). Era

Carlo Schneider di che la gronda part da la glied che utilisescha las purschidas da la «Überlebenshilfe» saja umens. «I para che dunnas consumeschan auter, respectivamain pli pauc savens en la publicitad. Ellas tschertgan forsa plitost sustegn, ma chattan era pli tgunsch insanua in sutteg, quai ch'è savens cumbinà

«En Svizra hai en general dà midadas en la scena da drogads, independent da la pandemia.»

Patrik Degiacomi

cun dependenzas problematicas», declera el. Per regla s'inscuntran 20 fin 30 personas che consumeschan alcohol, cannabis e drogads fermas en il «Stadtgarten» a Cuira, concluda il rapport da las intervistas d'experts. Dal matg fin l'october 2020 hajan ins gi contact cun 110 personas da las qualas bleras vivian a Cuira (44%). Il consum saja surtut visibel a Cuira, en

las valladas na sappian ins da naginas talas scenas, statti en il rapport da «Infodrog».

«En Svizra hai en general dà midadas en la scena da drogads, independent da la pandemia», manegia Patrik Degiacomi. L'agressivitat e l'activitad saja s'augmentada. I vegnia inhalà plitost pitschnas purziuns cocain, perquai ch'igl è pli simpel da survegnir talas. L'effect na cuntinuescha però betg ditg, uschia ch'ins stoppia suenter ina pitschna pausa consumar danovamain.

Nagina stanza da consum

Tenor las recumandaziuns da «Infodrog» ha la regenza grischuna decidì da cuntinuar cun la lavur sociala extra muros («aufsuchende Sozialarbeit») e d'organisar in nov lieu da contact pli central. L'access a terapia ed a purschidas d'agid duai vegnir megliurà. Ina stanza da consum na vegn dentant betg realisada per il mument. Ins veglia l'emprim observar l'effect dal nov post da consultaziun. «Avant che las mesiras da la regenza pon vegnir realisadas, sto il Cussegl grond metter a disposiziun ils meds finansials en la discussiun dal budget il december 2021», di *Susanna Gadiant*.

Carlo Schneider di ch'il project da pilot dal «streetwork», tar il qual collavuratur e collavuraturas tschertgan il contact en la publicitad cun singulas personas pertugadas, haja in effect positiv. «Igl è in impurtant pass en l'endretga direziun, ma nus ed autras personas dal fatg ans avessan giavischà ch'i vegnia bainspert realisà ina stanza da consum», manegia el.

Era Patrik Degiacomi na crai betg che las mesiras tanschian. «I regia ina disproporziun tranter la scena e las purschidas d'agid», di el. En ina stanza da consum pudess ins laschar controllar las drogads tar in uschenumnà «drug check-in». Lura na stuessan las drogads betg pli vegnir consumadas sin tualettas u bancs ed ins avess ina meglra survista tge che marscha en la scena. Patrik Degiacomi giavischa ch'i vegnia bainspert prendi a mauns dapli da la vart dal chantun.